

01

庶人挽歌辞

死生各异方。昭非神色衰。
贵贱礼有差。外相盛已集。
魂衣何盈盈。旛旒何习习。
父母拊棺号。兄弟扶筵泣。
灵輶动鞶[左车右蓟]*。龙首矫崔嵬。
挽歌挟馘唱。嘈嘈一何悲。
浮云中容与。飘风不能回。
渊鱼仰失梁。征鸟俯坠飞。
念彼平生时。延宾陟此帟。
宾阶有邻迹。我降无登辉。

*这个字编辑器显示不出来，大家感受一下就好。下同。

02

赴洛道中作 其二

远游越山川，山川修且广。
振策陟崇丘，安辔遵平莽。
夕息抱影寐，朝徂衔思往。
顿辔倚嵩岩，侧听悲风响。
清露坠素辉，明月一何朗。
抚枕不能寐，振衣独长想。

03

拟青青陵上柏诗

冉冉高陵蘋。习习随风翰。

人生当几时。譬彼浊水澜。
戚戚多滞念。置酒宴所欢。
方驾振飞辔。远游入长安。
名都一何绮。城阙郁盘桓。
飞阁纓虹带。层台冒云冠。
高门罗北阙。甲第椒与兰。
侠客控绝景。都人骖玉轩。
遨游放情愿。慷慨为谁叹。

04

讲汉书诗

税驾金华。讲学祕馆。
有集惟髦。芳风雅宴。

05

招隐诗

明发心不夷。振衣聊踟躅。
踟躅欲安之。幽人在浚谷。
朝采南涧藻。夕息西山足。
轻条象云构。密叶成翠幄。
激楚佇兰林。回芳薄秀木。
山溜何泠泠。飞泉漱鸣玉。
哀音附灵波。颓响赴曾曲。
至乐非有假。安事浇淳朴。
富贵苟难图。税驾从所欲。

06

遨游出西城诗

遨游出西城。按辔循都邑。
逝物随节改。时风肃且熠。
迁化有常然。盛衰自相袭。
靡靡年时改。冉冉老已及。
行矣勉良图。使尔修名立。

07

短歌行

置酒高堂，悲歌临觞。
人生几何，逝如朝霜。
时无重至，华不再扬。
蘋以春晖，兰以秋芳。
来日苦短，去日苦长。
今我不乐，蟋蟀在房。
乐以会兴，悲以别章。
岂曰无感，忧为子忘。
我酒既旨，我肴既臧。
短歌可咏，长夜无荒。

08

上留田行

嗟行人之蔼蔼。

骏马陟原风驰。
轻舟泛川雷迈。
寒往暑来相寻。
零雪霏霏集宇。
悲风徘徊入襟。
岁华冉冉方除。
我思缠绵未纾。
感时悼逝凄如。

【陆云】

09

南衡 其一

南衡惟岳，峻极昊苍。
瞻彼江湖，惟水泱泱。
清和有合，俊乂以藏。
天保定尔，茂以琼光。
景秀濛汜，颖逸扶桑。
我之怀矣，休音峻扬。

10

答张士然诗

行迈越长川，飘飖冒风尘。
通波激枉渚，悲风薄丘榛。
修路无穷迹，井邑自相循。

百城各异俗，千室非良邻。
欢旧难假合，风土岂虚亲。
感念桑梓域，仿佛眼中人。
靡靡日夜远，眷眷怀苦辛。